



Broj: UP-I-KSI-09-15/23
Datum: 12.05.2023. godine

Na osnovu člana 25. Zakona o sprečavanju sukoba interesa u institucijama Brčko distrikta Bosne i Hercegovine („Službeni glasnik Brčko distrikta Bosne i Hercegovine“, broj: 04/21), Komisija za odlučivanje o sukobu interesa, postupajući po službenoj dužnosti, u predmetu utvrđivanja povrede odredaba navedenog Zakona od strane T.G. iz Brčkog, ulica [REDACTED] broj [REDACTED], člana Izborne komisije Brčko distrikta Bosne i Hercegovine, nosioca javne funkcije, na 55. sjednici održanoj dana 12.05.2023. godine, donijela je

RJEŠENJE

1. **UTVRĐUJE SE** da je T.G. iz Brčkog, ulica [REDACTED] broj [REDACTED], član Izborne komisije Brčko distrikta Bosne i Hercegovine, kao nosilac javne funkcije postupio protivno članu 19. stav (1) i stav (2) i članu 20. Zakona o sprečavanju sukoba interesa u institucijama Brčko distrikta Bosne i Hercegovine, na način da dana 14.01.2022. godine u podnesenom Izvještaju o imovinskom stanju na obrascu o imovinskom stanju nosioca javne funkcije, bračnog i vanbračnog druga, djece i drugih članova porodičnog domaćinstva kao i lica prema kojima nosilac javne funkcije ima zakonsku obavezu izdržavanja-Aneks II Komisiji za odlučivanje o sukobu interesa, nije prijavio nekretnine, ostale prihode kao i pokretne stvari vrijednosti veće od 5.000,00 KM.
2. Za učinjeno kršenje odredaba Zakona o sprečavanju sukoba interesa u institucijama Brčko distrikta Bosne i Hercegovine, T.G. se shodno članu 39. stav (1) tačka b) navedenog Zakona izriče novčana kazna, i to obustavom dijela isplate neto mjesečne naknade, koju nosilac javne funkcije prima za obavljanje javne funkcije u iznosu od 10% (deset posto) neto naknade.

Образложење

Komisija za odlučivanje o sukobu interesa je po službenoj dužnosti Zaključkom, broj: UP-I-KSI-09-15/23 od 09.02.2023. godine, pokrenula postupak za odlučivanje o povredi odredaba Zakona o sprečavanju sukoba interesa u institucijama Brčko distrikta Bosne i Hercegovine protiv nosioca javne funkcije T.G. iz Brčkog, ulica [REDACTED] broj [REDACTED], člana Izborne komisije Brčko distrikta Bosne i Hercegovine, jer je posumnjala u tačnost i potpunost podataka u podnesenom Izvještaju o imovinskom stanju na obrascu o imovinskom stanju nosioca javne funkcije, bračnog i vanbračnog druga, djece i drugih članova porodičnog domaćinstva kao i lica prema kojima nosilac javne funkcije ima zakonsku obavezu izdržavanja-Aneks II, zbog neusklađenosti između prijavljene imovine u Izvještaju o imovinskom stanju, podnesenom dana 14.01.2022. godine od strane nosioca javne funkcije Komisiji za odlučivanje o sukobu interesa i podataka prikupljenih od nadležnih organa i institucija o nekretninama, ostalim prihodima i

pokretnim stvarima vrijednosti veće od 5.000,00 KM, jer nosilac javne funkcije nije u Izvještaj o imovinskom stanju unio podatke o nekretninama, i to: nekretnina označena kao parcela broj: [REDACTED], [REDACTED], garaža u podrumu 10 (A.10), u površini od 12 m², upisana u poduložak broj: [REDACTED], etažni uložak, broj: [REDACTED] u zk. uložku, broj: [REDACTED] za k.o. Brčko 1, vlasništvo T.G. sa dijelom od 1/3; nekretnina označena kao parcela, broj: [REDACTED], [REDACTED], njiva 6. klase, u površini od 25086 m², upisana u zk. uložak, broj: [REDACTED], za k.o. Brezik, suvlasništvo T.G. sa dijelom od 1/3; nekretnina označena kao parcela, broj: [REDACTED], [REDACTED], njiva 6. klase, u površini od 68m², upisana u zk. uložak, broj: [REDACTED], za k.o. Brezik, suvlasništvo T.G. sa dijelom od 1/3; nekretnina označena kao parcela, broj: [REDACTED], [REDACTED], njiva 6. klase, u površini od 06 m², upisana u zk. uložak, broj: [REDACTED], za k.o. Brezik, suvlasništvo T.G. sa dijelom od 1/3; nekretnina označena kao parcela, broj: [REDACTED], [REDACTED], nn, u površini od 572 m², upisana u zk. uložak, broj: [REDACTED], za k.o. Brezik, suvlasništvo T.G. sa dijelom od 1/3.

Uočena je neusklađenost između prijavljene imovine u Izvještaju o imovinskom stanju-Aneks II i podataka dobijenih od strane Odjeljenja za javni registar Vlade Brčko distrikta Bosne i Hercegovine u dijelu da nije u Izvještaj o imovinskom stanju unesen M1-putnički automobil, marka Volkswagen, tip 6R, registarske oznake: [REDACTED], godina proizvodnje 2011, vlasništvo T.G., nosioca javne funkcije, a koje vozilo je vrijednosti veće od 5.000,00 KM. Osim toga, uvidom u dopis Direkcije za finansije Brčko distrikta Bosne i Hercegovine, broj: 14.09-04.3-1106/22 od 29.07.2022. godine, uočeno je da nije prijavljen ni prihod o zakupa stana u mjesečnom iznosu od 100,00 KM po osnovu Ugovora o zakupu stana zaključenog dana 01.06.2020. godine na period od jedne godine između T.G. i „[REDACTED]“, a koji stan se nalazi u ulici [REDACTED] broj [REDACTED] Brčko, čime je postupio protivno odredbi člana 19. stavovi (1) i (2), te odredbi člana 20. Zakona o sprečavanju sukoba interesa u institucijama Brčko distrikta Bosne i Hercegovine.

Nosilac javne funkcije je istim Zaključkom pozvan da Komisiji za odlučivanje o sukobu interesa dostavi izjašnjenje u roku od 15 dana od dana dostavljanja Zaključka.

Nakon prijema Zaključka o pokretanju postupka, broj: UP-I-KSI-09-15/23 od 09.02.2023. godine, zaprimljen 10.03.2023. godine, T.G., član Izborne komisije Brčko distrikta Bosne i Hercegovine, kao nosilac javne funkcije je dana 20.03.2023. godine dostavio Komisiji za odlučivanje o sukobu interesa pisano Izjašnjenje u kojem, između ostalog, navodi da se nekretnina označena kao parcela, broj: [REDACTED], garažno mjesto nalazi u [REDACTED] u sklopu zgrade u kojoj se nalazi i stan, koji koristi njegov sin, a stan je prijavio u Izvještaju, smatrajući da se to odnosi i na garažu, jer su obje nekretnine upisane u isti zk. uložak, a osim toga, idealni suvlasnički dio u zgradi obuhvata i garažu. Nadalje, u pogledu nekretnine, a čiji je suvlasnik sa dijelom od 1/3, označena kao [REDACTED], a što u naravi predstavlja neobrađenu njivu i koja se nalazi u Breziku, istu je zaboravio prijaviti zbog male vrijednosti iste, a nije ni u posjedu navedene nekretnine od momenta sticanja, a što je otprilike 20 godina, jer je u posjedu kum, koji je 2/3 vlasnik nekretnine. Prihod od zakupa stana koji se nalazi na adresi [REDACTED] broj [REDACTED], a koji stan je prijavljen u Izvještaju potpuno je izgubio iz vida, jer je prihod zanemarive vrijednosti. U odnosu na neprijavljeno putničko vozilo marke Volkswagen, registarskih oznaka: [REDACTED], isti koristi supruga I.G., a bio je ubjeđenja da je kod Odjeljenja Vlade Brčko distrikta Bosne i Hercegovine navedeno vozilo registrovano na njegovo ime. Budući da su učinjeni propusti u podnesenom izvještaju od 14.01.2022. godine rezultat zablude, površnosti i nemara, predlaže da se postupak obustavi, jer su posljedice nikakve ili zanemarive.

Uvidom u dopis Osnovnog suda Brčko distrikta Bosne i Hercegovine-Registar zemljišta, broj: RZ-003223/22 od 01.09.2022. godine, odnosno zk. izvod, broj: [REDACTED] k.o. Brezik utvrđeno je da je T.G. suvlasnik na nekretninama sa dijelom od 1/3 i uvidom u etažni

uložak, broj: [REDAKT], poduložak broj: [REDAKT] za k.o. Brčko 1 utvrđeno je da je T.G. vlasnik garaže sa dijelom od 1/1.

Nadalje, Uvidom u dopis Odjeljenja za javni registar Vlade Brčko distrikta Bosne i Hercegovine, broj: 26-001709/22 od 05.10.2022. godine utvrđeno je da je automobil marke Volkswagen, tip: 6R, registarskih oznaka: [REDAKT], godina proizvodnje: 2011., u vlasništvu T.G., nosioca javne funkcije.

Uvidom u dopis Direkcije za finansije Brčko distrikta Bosne i Hercegovine, broj: 14.09-04.3-1106/22 od 29.07.2022. godine, utvrđeno je da T.G. ostvaruje mjesečni prihod u iznosu od 100,00 KM od zakupa stana u ulici [REDAKT] broj [REDAKT] po osnovu Ugovora o zakupu stana, zaključenog dana 01.06.2020. godine na period od jedne godine između T.G. i „[REDAKT]“ d.o.o.

T.G. obnaša funkciju člana Izborne komisije Brčko distrikta Bosne i Hercegovine na osnovu Odluke Skupštine Brčko distrikta Bosne i Hercegovine o imenovanju četiri člana Izborne komisije Brčko distrikta Bosne i Hercegovine, broj: 01-02-56/17 od 01.02.2017. godine, te je shodno članu 2. Zakona o sprečavanju sukoba interesa u institucijama Brčko distrikta Bosne i Hercegovine nosilac javne funkcije i upisan je u Registar javnih funkcija i nosilaca javnih funkcija.

Članom 22. Poslovnika o radu Komisije za odlučivanje o sukobu interesa u institucijama Brčko distrikta Bosne i Hercegovine propisano je da je stranka u postupku u smislu ovog Poslovnika nosilac javne funkcije.

Članom 19. stav (1) Zakona o sprečavanju sukoba interesa u institucijama Brčko distrikta Bosne i Hercegovine propisano je da je nosilac javne funkcije dužan u roku od 30 (trideset) dana od dana stupanja na javnu funkciju, podnijeti Komisiji Izvještaj, za sebe i bračnog i vanbračnog druga, djecu, druge članove porodičnog domaćinstva kao i lica prema kojima nosilac javne funkcije ima zakonsku obavezu izdržavanja, prema stanju na dan kada je izabran, odnosno imenovan, dok je stavom (2) istog člana, između ostalog propisano i da Izvještaj sadrži lične podatke nosioca javne funkcije i članova njegove uže porodice, uključujući JMB, podatke o funkciji koju nosilac javne funkcije obavlja, dok je tačkom b) istog člana propisano i da sadrži podatke o imovini, uključujući novac, račune u banci, poslovnu dokumentaciju, dionice, vrijednosne papire, obveznice, nepokretnu imovinu, stanarsko pravo i drugu imovinu i dobra u vrijednosti većoj od 5.000,00 KM u Bosni i Hercegovini i inostranstvu.

Primjenom navedenih zakonskih odredaba na utvrđeno činjenično stanje, ocijenjeno je u konkretnom slučaju da postoji povreda odredaba Zakona o sprečavanju sukoba interesa u institucijama Brčko distrikta Bosne i Hercegovine, s obzirom na to da T.G. nije u Izvještaju o imovinskom stanju podnesenom 14.01.2022. godine Komisiji za odlučivanje o sukobu interesa unio podatke o vlasništvu nad gore navedenim nekretninama, o ostalim prihodima kao i o vlasništvu nad pokretnim stvarima vrijednosti veće od 5.000,00 KM, čime je postupio protivno odredbi člana 19. stavovi (1) i (2) te članu 20. Zakona o sprečavanju sukoba interesa u institucijama Brčko distrikta Bosne i Hercegovine.

Član 38. Zakona o sprečavanju sukoba interesa u institucijama Brčko distrikta Bosne i Hercegovine propisuje sankcije za nosioca javne funkcije koji postupi suprotno odredbama navedenog Zakona.

Komisija je, shodno članu 39. Zakona o sprečavanju sukoba interesa u institucijama Brčko distrikta Bosne i Hercegovine, prilikom odlučivanja o vrsti sankcije koju treba izreći u konkretnom slučaju, u obzir uzela sve otežavajuće i olakšavajuće okolnosti kako bi izrečena sankcija u potpunosti odgovarala povredi Zakona. Kao otežavajuće okolnosti, Komisija je

cijenila činjenicu da je T.G. propustio unijeti podatke o većem broju nekretnina, ostalim prihodima i jednom automobilu, sve u vlasništvu nosioca javne funkcije. Nadalje, od olakšavajućih okolnosti, Komisija je cijenila da se radi o prvoj povredi odredaba Zakona od strane imenovanog, kao i da je T.G. predao Izvještaj o imovinskom stanju za 2022. godinu u kojem je upisao podatke o predmetnoj nepokretnoj imovini, automobilu i mjesečni prihod od zakupa stana, kao i činjenicu da se nakon pokretanja postupka detaljnije informisao o načinu popunjavanja Izvještaja o imovinskom stanju. Nadalje, cijenila je njegovo postupanje i odgovornost, ličnost nosioca javne funkcije, odnos imenovanog prema kršenju odredaba Zakona, opredijeljenost imenovanog da postupi u skladu sa Zakonom, te otkloni razloge koji su doveli do kršenja odredaba Zakona. Imajući u vidu sve naprijed navedeno, odlučeno je da se izrekne novčana kazna obustavom dijela isplate neto mjesečne naknade, koju nosilac javne funkcije prima za obavljanje javne funkcije u iznosu od 10% (deset posto) neto naknade kako je to navedeno u stavu (2) izreke rješenja i da ista u potpunosti odgovara težini i posljedicama povrede Zakona.

Komisija je, cijeneći sve dokaze pojedinačno i u međusobnoj vezi, shodno članovima 4., 25. i 39. Zakona, donijela rješenje kao u dispozitivu.

Odluka Komisije bit će objavljena na službenoj Internet stranici Komisije.

POUKA O PRAVNOM LIJEKU:

Shodno članu 37. stav (1) Zakona, ovo rješenje je konačno u upravnom postupku i protiv istog nije dopuštena žalba, ali se može pokrenuti upravni spor u roku od 30 dana od dana dostavljanja rješenja, tužbom pred Osnovnim sudom Brčko distrikta Bosne i Hercegovine.

Predsjednik
Komisije za odlučivanje o sukobu interesa

Admira Mujić, dipl. pravnik

Dostavljeno:

1. T.G., ulica _____, broj _____, Brčko distrikt BiH,
2. Internet stranici Komisije,
3. Evidenciji i
4. Arhivi.